

ԿԱՐԾԻՔ

Հարություն Գևորգի Սելիմյանի՝ «Դաւանական նոր իրավիճակը եւ ըմբռնումները՝ ըստ 19-րդ դարու 40-50-ական թթ. աւետարանական մամուլի (Կ. Պոլիս, Ջմյունիա)» Թ.00.05 - «Կրօնի տեսություն և պատմություն (պատմական գիտություններ)» մասնագիտությամբ պատմական գիտությունների թեկնածուի գիտական աստիճանի հայցման ատենախոսության մասին

19-րդ դարում թուլացման ուղին բռնած Մերձավոր Արևելքի ամենախոշոր տերությունը՝ Օսմանյան Թուրքիան, որն իրենից ներկայացնում էր սոցիալ-քաղաքական տարբեր աստիճանների վրա գտնվող մշակութային ու կրոնադավանական զանազան ընդհանրություններին պատկանող 60-ից ավելի ազգերի ու ցեղերի մի խառնարան, դարձել էր եվրոպական մեծ տերությունների և ԱՄՆ-ի քաղաքական մրցակցության առարկա:

Միաժամանակ, կայսրությունը պարարտ հող էր արևմտյան երկրների հոգևոր և բարոյական քաղաքակրթական արժեքների ներթափանցման համար, որն իրականացվում էր առաջին հերթին կայսրության քրիստոնյա ազգաբնակչության և հատկապես արևմտահայերի միջոցով, որոնք XIX դ. 40-60-ական թվականներին կյանքի ազատականացման պատճառով ապրում էին աշխարհայացքային և ազգային ոգու վերածնության միտումներ:

Արևմտահայ իրականության մեջ բողոքականությունը սկսել է տարածվել 1820-1830-ական թվականներից, երբ հատկապես 1831թ. սկսում է գործել ամերիկյան միսիոներական «Բորդ» ընկերությունը: Այդ էր պատճառը, որ ժողովուրդը հաճախ բողոքական միսիոներներին հավաքական անունով կոչում էր «ինգլիզ»՝ նախ և առաջ ի նկատի ունենալով վերջիններիս խոսակցական հիմնական լեզուն՝ անգլերենը:

Ամերիկյան, շվեցարական, գերմանական բողոքական կազմակերպությունները և խմբերը, ինչպես այլուր, այնպես էլ արևմտահայ իրականության մեջ արտահայտում էին իրենց երկրների տնտեսական ձգտումները և սոցիալական հող նախապատրաստում նրանց գաղութատիրական քաղաքականության իրականացման համար: Սակայն հայերը բողոքականություն էին ընդունում գլխավորապես հույսեր տածելով, որ կունենան եվրոպական երկրների և ԱՄՆ-ի պաշտպանությունը, կկարողանան կրթվել նրանց ուսումնական հաստատություններում և ձերբազատվել ազգային ճնշումներից: Արևմտահայությանն առաջարկվող օգնությունն իրականացվում էր դավանափոխության նախապայմանով, որը պարարտ հող է գտնում հիմնականում Կ.Պոլսում, Ջմյունիայում,

Նիկոմեդիայում, Մարաշում, Այնթապում և Օսմանյան կայսրության հայաբնակ այլ գավառներում ու քաղաքներում:

Արդյունքը լինում է այն, որ 1836թ. հայ ավետարանականների կողմից Կ.Պոլսում հիմնադրվում է «Բարեպաշտության միաբանություն» կազմակերպությունը, որի նպատակն էր գավառներում ավետարանական գաղափարների տարածումը: 1846թ. հուլիսի 1-ին Կ.Պոլսի Բերա թաղամասում 40 հայ ավետարանականների կողմից հիմնադրվում է Հայ ավետարանական եկեղեցին, որի առաջին հովիվ է ընտրվում Աբիսողոմ Խաչատուր Ութունճյանը:

Հայ ավետարանականները հարուցելով բողոքական միսիոներների դժգոհությունը, չհարեցին բողոքական հարանվանություններից որևէ մեկին և կոչվեցի Հայաստանյայց ավետարանական եկեղեցի: Իսկ արդեն չորս տարի անց՝ 1850թ. նոյեմբերի 27-ին սուլթան Աբդուլ Մեջիդը հատուկ ֆերմանով 500 հոգուց բաղկացած Կ.Պոլսի հայ ավետարանական համայնքը ճանաչեց որպես առանձին կրոնական համայնք՝ «միլլեթ», որով սկիզբ դրվեց հայ ավետարանականների պաշտոնական գործունեությանը:

Ազգային-ազատագրական շարժումների ուժեղացման համեմատ բողոքական եկեղեցին փոխեց իր գործունեության մեթոդները՝ քրիստոնեական վարդապետության մեջ ներառելով տեղական պաշտամունքային ծեսերը: Հետևելով ունիթորների օրինակին բողոքականները սովորում էին հայերեն, աշխարհաբար թարգմանում կրոնական և ոչ կրոնական բնույթի գործերը, քարոզներն իրականացնում ժողովրդին հասկանալու լեզվով: Աստվածաշունչն ավելի հասանելի դարձնելու նպատակով ավետարանականները այն թարգմանեցին աշխարհաբար և հայատառ թուրքերեն, հրատարակեցին բացմաթիվ կրոնական գրքեր, դասագրքեր, թերթեր ու ամսագրեր: Վերջիններս հրատարակում են նաև հայ առաջին աշխարհաբար պարբերականը՝ «Շտեմարան պիտանի գիտելաց» վերնագրով, որը տպագրվում էր Ջմյունիայում 1839-1854թթ.:

Վերապատվելի Հարություն Սելիմյանի կրոնա-աստվածաբանական և եկեղեցագիտական գիտակարգային վերլուծությամբ պայմանավորված ատենախոսությունը նվիրված 19-րդ դարի 40-50-ական թթ. Կ. Պոլիսում և Ջմյունիայում Հայ ավետարանական եկեղեցու ազդեցությամբ ձևավորված կրոնա-դավանաբանական նոր մոտեցումների և ընկալումների լուսամասնմանը:

Սկզբից ևեթ նշենք, որ հեղինակը խնդրին մոտեցել է մեծ պատասխանատվությամբ ու նվիրումով և անթաքույց պոռթկումով է ներկայացրել իր ուրույն մոտեցումները: Շեշտադրելով դավանական նոր իրավիճակը Հ. Սելիմյանն ավետարանական եկեղեցու ըմբռնումները դարձրել է ուսումնասիրման առարկա՝ պատմաաստվածաբանական դրսևորումների համատեքստում:

Հեղինակն իր առջև խնդիր է դրել և փորձել է ժամանակագրական ցուցիչների շրջանակներում, պատմաաստվածաբանական համակարգված մոտեցմամբ տեսական ու համեմատական վերլուծության ենթարկել ավետարանական աստվածաբանական ժառանգության աշխարհնկալումը և դավանաբանական հայեցակարգի դիրքորոշումը:

Ատենախոսությունն ունի ընդունելի կառուցվածք և համամասնական ճիշտ բաժանում, որը ծառայում է թեմայի ըստ ամենայնի պարզաբանմանը: Այն բաղկացած է ներածությունից, երեք գլուխներից, վերջաբանից և գրականության ցանկից (169 համակարգչային էջ):

Ներածության մեջ հիմնավորված են ուսումնասիրվող հիմնահարցի արդիականությունը, հետազոտության նպատակներն ու խնդիրները, գիտական նորոյթը, կիրառական նշանակությունը, ատենախոսության ժամանակագրական շրջանակները, մեթոդաբանական հիմքը, տրված է հիմնահարցի ուսումնասիրման աստիճանը, օգտագործված աղբյուրների ու գրականության վերլուծությունը և կառուցվածքը:

Ատենախոսության **I գլխում**, որը վերնագրված է՝ **«Եվրոպական բարեկարգումն ու արևմտահայ ավետարանականները XIX դ. 40-ական թթ.»** հեղինակը երեք ենթագլուխների սահմաններում և աղբյուրագիտական որոշակի տվյալների ու փաստագրական վկայությունների հիման վրա փորձել է ներկայացնել բողոքական եկեղեցու հոգևոր ակունքները՝ եկեղեցու բարեկարգության գաղափարախոսների՝ Մարտին Լյութերի, Ժան Կալվինի և Ուլրիխ Յվինգլիի տեսությունները:

Վերապատվելի Հարություն Սելիմյանը հաջողությամբ վեր է հանել բողոքական դավանաբանության հինգ կարևոր դրույթները, այն է՝ 1) միայն Սուրբ գիրքը, 2) միայն հավատքով, 3) միայն շնորհով, 4) միայն Քրիստոսը, 5) փառքը միայն Աստծուն է:

Ատենախոսը կարողացել է նաև բացահայտել հումանիզմի և եկեղեցու բարեկարգության երկու հոսանքների միջև առկա հակասությունների հինգ ոլորտները, որոնք արտահայտվում են ա) ուսուցողական աստվածաբանության, բ) Սուրբ գրքի, գ) եկեղեցական աստվածաբանության, դ) ուսման և ե) հոետորաբանության նկատմամբ ուրույն վերաբերմունքով:

Վ. Հ. Սելիմյանն առանձնահատուկ մոտեցում է ցուցաբերել Կ.Պոլսում բողոքական քարոզչության գործում հայ ավետարանական շարժման դերի լուսաբանմանը: Նա հաջողությամբ ներկայացնում է Ավետարանական և քրիստոնյա մյուս եկեղեցիների տարբերությունները (Հայր Աստուծո, ս.Երրորդության, 7 խորհուրդների, եկեղեցու իշխանության ժխտման, հավատքի, պատարագի և այլն) և բողոքականության 3 հիմնական սկզբունքների հիման վրա առանձնացնում

Հայ ավետարանական եկեղեցու կազմակերպման 20 հիմնական դրույթները՝ չմոռանալով իհարկե ակնարկելու ավետարանականների գնահատելի դերը աշխարհաբար լեզվի տարածման գործում:

Կարևորություն է ներկայացնում I գլխի 3-րդ ենթավերնագիրը, ուր ներկայացվում են արևմտահայ իրականության և բողոքականության առաջին կրոնաթերթի՝ 180-ամյա «Աւետաբեր Շտեմարան»-ի բազմաբնույթ խնդիրներն ու նպատակները, որոնք իրենց մեջ ներառում են ինչպես արևմտահայ իրականության մեջ բողոքականության տարածման կարևորությունը, այնպես էլ կրթության և դաստիարակության միջոցով ազգի փրկության և կատարելագործման ճանապարհը: Հեղինակը բարեխղճությամբ արժևորել է թերթի համարներում տեղ գտած կրոնադավանաբանական, պատմաբանասիրական, գրական, կրթական, լեզվաբանական, լուսավորության, խրատաբանական, բարոյական վերածննդի և աշխարհիկ խնդիրներին նվիրված գրվածքների վերլուծությունը:

Ատենախոսության **II գլուխը** կրում է՝ «Սիրո, հույսի և մեղքի ըմբռնումները հայ ավետարանական եկեղեցու մեջ» խորագիրը և բաղկացած է երկու ենթագլուխներից:

Հ. Սելիմյանը նախ անդրադարձ է կատարել «Աւետաբեր» և Շտեմարան պիտանի գիտելեաց»-ի մեջ տեղ գտած սիրո և հատկապես Աստուծո նկատմամբ տածած սիրո և հույսի ընկալումներին, որոնք նա հիմնավորում է ինչպես հայ, այնպես էլ օտար բողոքական հեղինակների մոտեցումներով:

Ապա հեղինակը վեր է հանում պարբերականի էջերում տեղ գտած և սիրո պատվիրանին հակադրված մեղքի ու մեղսագործության ավետարանչական ընկալումները փորձելով ներկայացնել մեղքի՝ բարոյական այդ չարիքի կրոնափիլիսոփայական իր ուրույն մոտեցումները:

III գլուխը վերնագրված է՝ «Հոգևոր-մշակութային և ազգային կյանքի հիմնախնդիրները» և բաղկացած է երեք ենթագլուխներից:

Վերապատվելի Հ. Սելիմյանը բովանդակային վերլուծության է ենթարկել մի խումբ խնդիրներ, այն է՝ մարդու ազատականության տեսությունը, քաղաքակրթության և քրիստոնեության հարաբերակցությունը՝ ավետարանչական դավանաբանության հոլովույթում: Նա համապարփակ ներկայացնում է հայ ավետարանական պարբերականների մոտեցումները մշակույթի՝ որպես մարդկային ձեռքբերման կատարյալ ամբողջականության և հոգևոր մշակույթի՝ որպես հոգևոր կատարելության ամբողջության սահմանման վերաբերյալ:

Վերջաբանում հանրագումարի են բերված ատենախոսության հիմնական դրույթները, հետազոտության արդյունքներն ու ձևակերպված եզրակացությունները:

Նշենք, որ ատենախոսության ամենամեծ արժանիքն այն է, որ հեղինակը որոշակի փաստական նյութի օգտագործման հիման վրա կարողացել է վեր հանել և համակողմանի քննական վերլուծության ենթարկել ավետարանական աշխարհընկալման դրսևորման հոգևոր հիմքերը, դրանց վրա հայ և եվրոպացի մտածողների ազդեցության միտումները, գործոնները և դրսևորումները բնութագրող ընդհանրական և մասնավոր օրինաչափությունները: Բարեխղճորեն հաշվի առնելով կրոնագիտության նախորդ ժամանակաշրջանի արդյունքները և ըստ արժանվույն գնահատելով հետազոտողների վաստակը, հեղինակը ընդլայնել ու խորացրել է հարցի ուսումնասիրումը նոր ժամանակաշրջանի խնդիրների հաշվառմամբ և համեմատական կրոնագիտության մեթոդաբանությամբ ստեղծել մի աշխատանք, որը համակողմանի և ամբողջական է ներկայացնում ավետարանականության աստվածաբանական հայեցակարգի բովանդակային ուղղվածությունը: Հեղինակն առաջին անգամ արդի կրոնագիտական, պատմաաստվածաբանական և եկեղեցագիտական մեթոդաբանության հիման վրա քննական վերլուծության է ենթարկել հիմնահարցերի մի խումբ, որոնք միտված են տեսակետների ու մոտեցումների վերարժևորմանը:

Ատենախոսությունը գրելիս ատենախոսը հայտնաբերել, ուսումնասիրել և գիտական շրջանառության մեջ է դրել Աստվածաշունչ մատյանը, մատենագիրների ստեղծագործություններ, ընդհանրացրել է հայերեն, ռուսերեն, անգլերեն, գերմաներեն, ֆրանսերեն լեզուներով լույս տեսած և ատենախոսության լիարժեքությունն ապահովվող շուրջ 120 անուն մենագրություններ, գիտական հոդվածներ, հանրագիտարաններ, պարբերական մամուլի տեղեկություններ:

Բարձր գնահատելով ատենախոսության գիտական արժանիքը, միաժամանակ հարկ ենք համարում նշել, որ կատարված աշխատանքը զերծ չէ նաև որոշ թերացումներից, որի կապակցությամբ ցանկանում ենք արտահայտել մեր որոշակի ցանկությունները:

1. Կարծում ենք, որ նպատակային կլիներ ատենախոսության մեջ տեղ գտած բողոքական աստվածաբանության բովանդակային նյութի վերլուծությունը ներկայացվել ոչ թե առանձին, այլ Կ. Պոլսի և Ջնյունիայի ժամանակի հասարակական-քաղաքական և կրոնա-եկեղեցական կյանքի խմորումների հետ սերտորեն շաղախված, որով կհարստացվեր և կուժեղացվեր ատենախոսության պատմական հենքը և էլ ավելի ամբողջական կդառնար հիմնահարցի լիարժեքությունը:

2. Ատենախոսությունը էլ ավելի կշահեր, եթե աշխատանքի մեջ տեղ գտնեին թեմային առնչվող և հիմնահարցի գիտականությունն ապահովող այլ աշխատություններ ևս:

1. Գաբրիելյան Ս., Հայ բողոքականության անցյալն ու ապագան, Կ. Պոլիս, 1888:

2. Թութիկյան Վ., Հայ ավետարանական եկեղեցին 1846-1996, Ա. տ. և թ., 1996:

- 3. Պետիկյան Ա., Հայաստանյայց Ավետարանական Եկեղեցի. Պատմական ակնարկներ, Նյու Յորք, 1946:
- 4.Տերոյան Վ., Գիտական և հրապարակախոսական աշխատություններ, Եր., 2006:
- 5.Ութուճյան Ստ., Ծագումն և ընթացք Ավետարանականության ի Հայս, Կ.Պոլիս, 1914:
- 6.Փայասյան Ստ., Ամերիկյան բողոքական միսիոներների գործունեությունն Արևմտյան Հայաստանում 19-րդ դարի սկզբից մինչև 1880-ական թվականների կեսերը, /թեկն. Ատենախոսություն/, Եր., 2007:
- 7.Քասունի Ե., Հայ ավետարանականության նպաստները հայ ժողովրդի կրոնական կյանքին, Բեյրութ, 1946:
- 8.Leon Arpee, A Century of Armenian Protestantism, N.Y., 1972.
- 9.Chopourian G., The Armenian Evangelical Performance, N.Y., 1972.
- 10.Chakmakjian H., The Armenian Evangelical Movement, Fresno, 1985.
- 11.Հայաստանյայց ավետարանական եկեղեցու պաշտոնական կայք <http://www.eca.am>
- 12.Ամերիկայի Հայ Ավետարանչական ընկերակցության (ԱՀԱԸ) պաշտոնական կայք. <http://amaa.am/am>

3. Կարծում ենք, որ ըստ արժանվույն համակարգված չէ գրականության ցանկը: Այսպես՝ Աստվածաշունչ մատյանը ներկայացված է ընդհանուր՝ գրքեր բաժնի մեջ, մինչդեռ ցանկալի կլիներ, որ այն ներկայացվեր առանձին, կամ նոր՝ մատենագիրներ ենթավերնագրի տակ, որտեղ պետք է առանձնացվեին նաև Գրիգոր Տաթևացու և Հովհան Ոսկեբերանի աշխատությունները, որոնք նույնպես, առանց տարբերակման տեղ են գտել ընդհանուր՝ գրքեր բաժնի հատվածում: Առանձին՝ հանրագիտարաններ բաժնում պետք է ներկայացվեր «Քրիստոնյա Հայաստան» հանրագիտարանը, իսկ առանձին՝ գեղարվեստական գրականություն բաժնում պետք է ներկայացվեին Ա. Դանթեի և Րաֆֆու երկերը: Պարբերական մամուլի մեջ տեղ են գտել «Լրաբեր» հաս.գիտ., «Կանթեղ», «Հայագիտական հանդես», «Հայկազեան հայագիտական հանդես», «Նորավանք», «Պատմա-բանասիրական հանդես» գիտական ամսագրերը, որոնք պետք է ներկայացվեին «հոդվածներ» բաժնում, սակայն անպայման պետք է նշվեր հեղինակը, հոդվածի վերնագիրը, հրատարակության թիվը, համարը և էջերը:

4. Ճիշտ չեն ներկայացված նաև գիտական ապարատի հղումների հատվածը, որոնք շատ անգամ դրված են նախադասության կենտրոնում: Էջ 36-ում բացակայում է թիվ 34-ի հղումը: Էջեր

չունեն թիվ 53, 70, 77 հղումները: Գրեթե իսպառ բացակայում են «Աւետաբեր եւ Շտեմարան պիտանի գիտելաց»-ից մեջբերված հղումների էջերը:

Հիշյալ թերություններն ամենևին էլ չեն նսեմացնում գիտականության դիրքերից գրված Վեր. Հ. Սելիմյանի ատենախոսության արժեքը, քանի որ այն ամբողջությամբ համապատասխանում է թեկնածուական ատենախոսություններին ներկայացվող պահանջներին, ունի գիտագործնական և ճանաչողական որոշակի արժեք և հարստացնում է հիմնահարցի պատմագրությունը:

Ուստի հաշվի առնելով կատարված բարեխիղճ աշխատանքը միջնորդում ենք պատմական գիտությունների գիտական աստիճաններ շնորհող «Կրոնի տեսություն և պատմություն» մասնագիտական խորհրդին՝ Հարություն Գևորգի Սելիմյանին շնորհել իր հայցած պատմական գիտությունների թեկնածուի գիտական աստիճան, որին նա լիովին արժանի է:

Պաշտոնական ընդդիմախոս՝  **ԱՎԵՏԻՍ ՀԱՐՈՒԹՅՈՒՆՅԱՆ**

Երևանի Խ. Աբովյանի անվան հայկական պետական մանկավարժական համալսարանի Հայոց պատմության ամբիոնի պրոֆեսորի պաշտոնակատար, պատմական գիտությունների թեկնածու

Հայոց պատմության ամբիոնի պրոֆեսորի պաշտոնակատար, պատմական գիտությունների թեկնածու Ա. Հարությունյանի ստորագրությունը հաստատում եմ:

Խ. Աբովյանի անվան ՀՊՄՀ-ի

**Գիտական քարտուղար
Մանկագիտ. թեկնածու, դոցենտ**

17. 02 2021թ.



Մ.Մ. ԻՍՊԻՐՅԱՆ